



1913-yil aprel oyidan chiqib boshlagan

Fidoyilik —
Vatanga xizmat demak!

2024-yil 3-avgust, shanba,
90 (23.967)-son

**KUN
HIKMATI**

Inson
iztirobli
onlaridagina
baxtning
mohiyatini
tushunib
yetadi

Sayyor qabul

Odamlar hokimdan nima so'rayapti?

Bundan bir yarim yillar oldin viloyat hokimining sayyor qabuliga kelgan soni mingdan ziyod ekanini ko'rib hayron qolganman: Shuncha muammo shu yerga qadar ko'tarilgani tuman, shaharlardagi tashkilotlarda odamlarning masalasi hal bo'lmaganini anglatmasmikin, degan xayolga borganman. Qolaversa, boshqa rahbarlar sayyor qabullarida 20-50 nafar odamga ko'zim o'rgangan ekan o'shanda. Kecha yana viloyat hokimining sayyor qabuliga bordim, bu safar ham murojaat qiluvchilar mingdan kam emas.



Bu, birinchidan, "mening muammomni faqat viloyat hokimi hal qilishi mumkin" degan ishonch bo'lsa, ikkinchi tomondan, barcha muammomning o'z "egasi", tizimi bo'lgani holda hali ham minglab odamlar viloyat hokimi qabuliga oshiqishi joylardagi boshqaruv idoralari faoliyatiga berilgan baho, nazariyda.

Umuman, bunalik ko'p murojaatlar to'planishining o'zi bir mavzu ekan. Ba'zan tahririyatga biror soha mas'ulining hisobotini ko'tarib kelishadi faoliyatimizni yoritaylik deb. Hisobotda "yilning shu davriga qadar aholidan tushgan ... ta shikoyat va murojaatlar ijobiy hal etilgani" mamnuniyat bilan qayd etiladi. Bizda esa savol tug'iladi: bu shikoyatlarni ijobiy hal etish mumkin ekan, nega ular shikoyat darajasiga yetgan, nega joyida, shikoyat bo'lmaganidan oldin hal bo'lmagan?

Viloyat hokimi sayyor qabuliga kelganlarning ham aksariyati aytgan muammolar aslida joyida hal etish mumkin bo'lgan masalalar. Shuning uchun ham, oldin aytganimizdek, bunday yirik sayyor qabullardan keyin albatta, joyida hal etsa bo'ladigan murojaatlarining hududiylikiga e'tibor qaratish, ayniqsa, ayni masala bo'yicha oldin qayerlarga murojaat etilgani va qay tariqa o'rganilganiga aniqlik kiritilishi shart.

Masalaning yana bir qancha tomonlari bor, albatta. Qabulda hali ham "menga uy olib bering", "menga pul bering" (moddiy yordam) deb keluvchilar bor ekan. Viloyat hokimi esa bir necha marta "Biz sizga uy olib berolmaymiz, bunday tartib yo'q, subsidiya oling. Ammo bunga ham aralasha olmaymiz, buning o'z talablari, nizomi bor, buyruq bilan hal bo'lmaydi" deb eslatishiga to'g'ri keldi.

Ammo bizga eng ta'sir qilgani bu ham emas. Qabulga sud bilan bitadigan ish yuzasidan ham ko'plab murojaat bo'lar ekan. Nega sudlar bilan bitadigan ish uchun fuqarolar sud idoralariga emas, aynan hokimga kelishi jiddiy o'ylantiradigan masala, albatta. Hatto sud qaroridan norozi bo'lib qabulga kelganlar ham bo'ldi. Ularga bu kabi masalalar bilan qayerga murojaat etish lozimligi tushuntirildi.

Nafaqat Samarqandda, ko'plab hududlarda uchraydigan masala — noqonuniy qurilishlar bo'yicha ham shikoyatlar ko'p



bo'ldi. Masalan, Samarqand shahridagi Imom Vose mahallasidan kelgan kishilar hududda noqonuniy qurilish bo'layotgani, uchta oilaning uyiga zarar yetgani, hech qanaqa kompensatsiya berilmaganidan shikoyat qildi. Holat o'rganiladigan bo'ldi.

Doimgidek davolanish masalasida yordam, order so'rab kelganlar ham bo'ldi. Bunday masalalar yuzasidan ham joyida hal etish uchun tegishli mutasaddilarga topshiriq berildi.

Yo'l, kommunal soha, xususan, elektr ta'minoti, ichimlik suvi, tarmoqlarni yangilash masalalarida murojaatlar qayd etildi.

Misol uchun, Qo'shrabot tumanining Qovunchi mahallasida yashovchi O'roqboy Safarov xuddi shu masalalar hamda qishloqda maktab filiali qurilishida yordam so'radi.

Ayni vaqtda umumta'lim maktablariga qabullar jarayoni bo'lgani uchun shu masalada ham murojaat qiluvchilar ko'p ekan e'tiborimizni tortdi. Jumladan, Samarqand shahrida yashovchi fuqaro farzandini maktabga qo'yishga yordam so'radi. Aftidan, ta'lim tizimi mutasaddilari qabullar tartibi bo'yicha tartib-qoidalarni barchaga yetkazishga harakat qilishlari lozim. Masalan, oila asli chekka tumandan, ammo ishlash, pul topish maqsadida vaqtincha Samarqand shahrida yashaydi, ularning farzandlarini maktabga qabul qilishda muammolar yuzaga keladi. Bu kabi holatlarga ham yechim topish, aniq yechimi bo'lsa, aholiga tushuntirish kerakka o'xshaydi.

Murojaatchilardan biri, Ko'zi oziqlar jamiyati viloyat bo'limi rahbari jamiyat binosining ta'mirlalab ekani, shuningdek, avtomashina ham kerak bo'layotganini ma'lum qildi. Har ikki masala tez orada hal etilishi aytili.

Yuqorida qaysi hududlardan va tizimdan murojaatlar ko'p bo'layotganiga e'tibor qaratish lozimligini aytdik. Ammo bunda yana bir jihat, murojaatchining haq yoki nohaq ekaniga ham e'tibor berish kerak. Masalan, noqonuniy yerni egallab olib, qabulda "mening yerimga hujjat qilib berishmayapti" degan muo'jatchining muammosiga yechim topib bermagan mutasaddilar aybdor bo'lib qolmasligi kerak, bizningcha.

Anvar MUSTAFOQULOV,
"Zarafshon" muxbiri.
Husan ELTOYEV (surat).

YUNESKO shafeligidagi an'anaviy "Sharq taronalari" o'n uchinchi xalqaro festivali bu yil ilk bor Samarqand xalqaro turizm markazidagi "Boqiy shahar" majmuasida o'tkaziladi. Ayni paytda festivalga tayyorgarlik jarayonlari qizg'in davom etmoqda.

Ko'pchilik bu galgi festival uchun nega "Boqiy shahar" majmuasi tanlanganini so'ramoqda, — deydi rejissyor Shamsiddin Usmonov. — Ma'lumki, moddiy madaniy merosimiz bo'lgan Registon ansambli tarixiy ahamiyatga ega. Ushbu yodgorlikni asrab-avaylash, yurtimizga kelayotgan sayyohlarga qadimiy obidalarimizni o'z holicha ko'rsatish, qolaversa, nafaqat Samarqandning, balki butun O'zbekistonning turizm salohiyatini targ'ib etish uchun barcha sharoit yaratilgan yangi turizm markazining imkoniyatlarini ko'rsatish maqsadida ushbu maskan tanlandi.

Keyingi paytda yurtimizda madaniyat va san'at sohasiga, jumladan, baxshichilik, maqom, lazgi va folklor san'atiga katta e'tibor qaratilmoqda. Festival ochilishida milliy san'atimiz bilan birga, sohadagi o'zgarishlarni ham ko'rsatishga harakat qilamiz. Hozirda rassomlar, dekoratorlar, aktyorlar va ommaviy sahnalarda chiquvchilar bilan tayyorgarlik ishlari olib boryapmiz.

Festivalga tayyorgarlik ko'rish va uni yuqori saviyada o'tkazish maqsadida Madaniyat vazirligining shtabi faoliyat ko'rsatmoqda. Shuningdek, ijodiy guruhlar, volontyorlar bilan ishlash, mehmonlarni kutib olish bo'yicha alohida ishchi guruhlar ham tashkil etilgan.



"Boqiy shahar" da "Sharq taronalari" yangraydi

Hozirga qadar 100 dan ortiq davlat vakillari "Sharq taronalari" festivalida ishtirok etish istagini bildirdi, — deydi viloyat madaniyat boshqarmasi boshlig'i o'rinbosari G'azal Sirojiddinov. — Ayni paytda mehmonlarni kutib olish, ularga qulaylik yaratish hamda festival bo'lib o'tadigan hududda viloyatlardan keladigan hunarmandlar ko'rgazma tashkil etishi uchun yaratilmoqda. Shuningdek, festivalda ishtirok etish uchun 13-14-avgust kunlari respublika ko'rik-tanlovi

e'lon qilingan bo'lib, unda professional xonanda va sozandalar ikki yo'nalishda bellashadi.

Festival doirasida 27-28-avgust kunlari «Sharq xalqlari musiqa madaniyati: globallashuv jarayonlarida ijodiy uyg'unlashuv tamoyillari» mavzusida xalqaro ilmiy-amaliy konferensiya o'tkaziladi va unda musiqashunos olimlar, ilmiy-tadqiqot markazlari olimlari hamda tadqiqotchilar ishtirok etadi.

Fazliddin RO'ZIBOYEV.

Xitoyda qanday kelishuvlarga erishildi?



Xabar qilganimizdek, joriy yilning 22-27-iyul kunlari viloyat hokimi boshchiligidagi delegatsiyaning Xitoy Xalq Respublikasi Shinjon-Uyg'ur avtonom rayoni, Guandun va Jiangu provinsiyalariga xizmat safari uyushtirildi. Delegatsiya tarkibida 200 ga yaqin samarqandlik ham bor edi.

Xizmat safari davomida Shinjon-Uyg'ur avtonom rayoni partiya qo'mitasi kotibi Ma Sinjuy hamda gubernatori Erkin Tuniyaz, Jiangu provinsiyasi gubernatori Syuy Kunlin, Guandun provinsiyasi gubernatori o'rinbosari Chjan Shofu hamda Xitoyning bir qator yetakchi kompaniyalari rahbarlari bilan uchrashuvlar, qayd qilingan hududlarda qo'shma biznes-forumlar o'tkazildi. Uchrashuv va tadbirlar doirasida viloyatimiz va Xitoy hududlari o'rtasida savdo-iqtisodiy, investitsiyaviy, madaniy-gumanitar aloqalarni rivojlantirish hamda yangi qo'shma investitsiya loyihalarini amalga oshirish bo'yicha kelishuvlarga erishildi.

(Davomi 3-sahifada) >>>

Bir jumlada



2024/2025-o'quv yilida oliy ta'lim muassasalariga kirish imtihonlarida eng yaxshi natija qayd etgan TOP-10 maktablar ro'yxatida Samarqand shahridagi 1-ixtisoslashtirilgan maktab 150,44 ball bilan yettinchi o'rinni egalladi.

Kattaqo'rg'on shahri tibbiyot birlashmasi mutasaddilari xitoylik hamkasblari bilan ilg'or tibbiy laborator tekshiruvlarni amalga oshirish, davlat-xususiy sherikchilik asosida laborator tekshiruvlarni amalga oshiruvchi MRT apparatini keltirish, jahon standartlariga mos mahalliy dorilarni ishlab chiqarish yuzasidan hamkorlik memorandumlarini imzoladi.

Kattaqo'rg'on tumanining Payshanba shaharchasidagi 1791-yilda Muhammad Amir Naqibbek tomonidan qurilgan tarixiy bino o'lkashunoslik muzeyiga aylantirildi.

Qo'shrabot tumani Shavona mahallasi aholisining toza ichimlik suvi bilan ta'minlanishini yaxshilash maqsadida 5 ta nasos va 2 ta inshoot rekonstruksiya qilinib, 800 metr tarmoq tortildi.

Narpay tumanida aholi ehtiyojidan kelib chiqib, "Oq-tosh Shahzod trans" MCHJ tomonidan "346-Mirbozor-Do'stlik" yo'nalishida avtobus harakati yo'lga qo'yildi.

Nurobod tumanidagi "Nurziyo" xususiy maktabining 3-sinf o'quvchisi Muhammadali Abdurasulov Qirg'iz Respublikasining Issiqko'l shahrida o'tkazilgan xalqaro mental arifmetika musobaqasida 1-o'rinni qo'lga kiritdi.

Oqdaryo tumani Po'latdarxon mahallasi hududidagi serqatnov yo'l yoqasida 1200 metrlik piyodalar yo'lakchasi barpo etildi.

Toyloq tumani Tepaqishloq mahallasining 1 kilometrlik ichki yo'llari asfalt qilindi, 9 kilometriga shag'allashtirildi, 2,6 kilometrlik piyodalar yo'laklari qurildi, 10 kilometrlik suv tarmog'i tortilib, 3 ta suv inshooti rekonstruksiya qilindi, ikkita transformator, 321 ta beton ustunlar o'rnatildi, 10 kilometr elektr tarmog'i, ikki kilometr internet aloqa tarmog'i tortildi.

